



IV GOVERNO CONSTITUCIONAL SEKRETARIA ESTADU KONSELLU MINISTRUS

KOMUNIKADU IMPRENSA

Soru-mutu Konsellu Ministru iha loron 17 fulan Marsu tinan 2010

Konsellu Ministru hala'o soru-mutu iha loron Kuarta ne'e, loron 17 fulan Marsu tinan 2010, iha Sala Soru-mutu Konsellu Ministru nian, iha Palásiu Governu, iha Dili, no halo aprovasaun ba:

1. Aprezentasaun Portál Governu nian

Web site ida ne'e, kona-ba Governu Timor-Leste, sei hato'o informasaun ne'ebé di'ak liu kona-ba atividade sira Governu nian, hó transparénsia liután, hodi nune'e kontribui ba sidania ida ne'ebé di'ak liu, iha nivel nasional, no informasaun ida ne'ebé di'ak liu kona-ba país, ba mundu.

Portál Governu nian ne'e fó mós asesu ba informasaun kona-ba nia istória resente País nian, ninia politika, lejizlasaun, atividade hirak ne'ebé dezenvolve ona no hirak ne'ebé tau ona iha agenda, membru Governu sira agora no uluk nian, entre informasaun barak seluk ne'ebé hakarak esklaresa di'ak liu opiniaun pública, ho dalan ne'ebé asesivel no transparente.

Portál Governu nian sei lansa ba públuku iha loron 30 fulan Marsu oin mai.

2. Dekretu-Lei kona-ba Rejime Jurídiku ba Estabelesimentu Ensinu Superiór

Konsellu Ministru halo aprovasaun ba deketu-lei ne'ebé sei estabelese Rejime Jurídiku Estabelesimentu Ensinu Superiór nian, hodi regula ninia konstituisaun, atribuisaun sira, ninia órgaun sira nia funsionamentu no kompeténsia, nomós ezersísiu tutela nian husi Estadu.

Objetivu esensial diploma ida ne'e nian mak, preparasaun sientífika no koñesimentu atu dezempeña funsaun vital sira Estadu nian, hodi fó ba estadu Kuadru hirak ne'ebé abilitadu, iha kuadru ida ne'ebé desentralizadu no autónomu.

Importante atu refere mós katak ensinu superiór nia objetivu mak kualifikasaun nivel aas ba timor-oan sira, produsaun no difuzaun koñesimentu, iha kuadru ida ho referénsia internasionál.

Konsellu Ministru halo mós análise ba:

1. Dekretu-Lei ne'ebé aprova Karreira Espesiál Profisionál sira Saude nian

Diploma ida ne'e kria baze sira ba enkuadramentu integradu no sustentavel profisionál sira saude nian iha rejime espesiál karreira nian no ho objetivu atu garante melloria substansiál iha disponibilidade, kompeténsia, ressetividade no produtividade forsa servisu nian ne'ebé hetan, liu husi kompensasaun finanseira ne'ebé justa no segura. Kompensasaun finanseira ida ne'e sei hetan ninia prinsípiu baze sira mak hanesan: integrasaun iha Servisu Nasionál Saude nian (ho hanoin atu hetan ekilibriu entre nesesidade sira organizasaun nian no kuadru efetivu sira); valorizasaun ba Profisionál sira Saude nian (haree tuir koñesimentu no empenhu, ne'ebé haree ba aplikasaun ida ne'ebé di'ak liu husi rekursu umanu ne'ebé disponivel no prosekusaun efetiva ba interese públiku kona-ba saude); estímulo ba dezvoltamentu profisionál; rasionalizasaun ba estrutura kargu no karreira nian.

Objetivu prinsipál setór ne'e nian mak mantein servisu hirak ne'ebé hala'o liu husi sistema atrativu ida kona-ba retensaun no motivaun ba kuadru sira ho poténsial no kualifikasaun aas.